

Fandenz Nanwt Raeuj Sim Lwghag Myauzcuz

爱心棉被温暖苗山娃

Mboengqneix daeuj, givwnh laebdaeb doekroengz, mbwn nit dangqmaz. Hoeng, gyoengq hagseng Lungzlinz Gak Cuz Swciyen Dwzngoz Yangh Lungzdung Vanzsiuj cix roxdaengz raeujrubrub, aenvih, youq ngoenznit daeuj daengz gaxgonq, Gvangjsih Gvangjbo Densi Gisuz Cunghsinh couh soengq 50 dauq gyaqcongzdiet song caengz caeuq 300 fan denz moqcancan nanwnwt hawj aen hagdangz youq diegbya dieg-nit neix lo, gaijgez le hagdangz gyaqcong noix caeuq gyoengq hagseng youq hagdangz ninzraeuj vwndiz. Baez giensoengq neix, miz 287 boux hagseng youq hagdangz gwnninz haenx ndaej hoemq le fandenz moq, hawj gyoengq lwghag Myauzcuz ndaw bya soengq daeuj raeujrub, sawj gyoengqde ndaej onjsim youq hagdangz doegsaw. (Loz Mingzgauj)



▲ Gvangjsih Gvangjbo Densi Gisuz Cunghsinh soengq hawj 50 dauq gyaqcong hawj Lungzdung Siujyoz.



▲ Gyoengq lwghag angq dwk umj denzmoq youq ndaw rungj.



▲ Bouxciengxgaeq youq ndaw ndoeng daeuq duzgaeq.

Bingzgoj:

Nungzminz Ndaw Ndoeng-faex Ciengx Gaeq Demsou Lai

平果:农民林下养鸡走上致富门路

Bingzgoj Yen Sinh' anh Cin Danghna Cunh miz 1570 moux reihnaz ndawde couh miz cien moux ndoengfaex. Aen mbanj neix dingq baihgwnz dangjvej, cwngfuj guh aen haucan "aen mbanj ndeu miz cungj binjbaiz ndeu" neix, leihyungh diegfaex swhyenz, youq ndaw ndoeng ciengx gaeq ra diuz loh baenzfouq. Dan bi 2012, aen mbanj neix ciengx baenz it bak fanh duz gaeq, dwg dangdieg mbanj ciengx gaeq okmingz ndeu.

Mbanjdanghna ciengx miz it bak fanh duz gaeq, liz mbouj ndaej cin cwngfuj yungh sim bangcoh. Cwngfuj roxyiuj gyoengq bouxcoz nungzminz mbanj neix siengj cangyez hoeng ngaenz mbouj gaeuq le, couh lienzhaeh Nungzcunh Sinyungse ciq ngaenz hawj gyoengqde, gungh ciq hawj 125 fanh maenz; bang gyoengqde cingj ndei dieg, guh ndei hong "sam doeng" — doeng loh, doeng raemx, doeng dienh, guh hangh hong neix, cwngfuj couh roengzngaenz 205 fanh maenz. Vihliux gaijgez bouxciengxgaeq gai gaeq vwndiz, cwngfuj yinxhaeuj Fubungz, Fungciengz, Canhvanz daengj sam aen giyez hung "gunghswh + gihti + hoh- ciengxgaeq" gij dajciengx mozsi moq neix daeuj gaijgez aen vwndiz gai gaeq.

Bi' gvaq, Mbanjdanghna gaenq miz 90 hoh youq ndaw ndoengfaex ciengx gaeq, gyoengqde bi gai gaeq bak fanh duz, souhaeuj 300 fanh maenz. Nungzminz youq ndaw ndoengfaex ciengx gaeq caencingq demsou lailai. (Vangz Cunhhoz)

Cenzcouh:

Conzdungj Minzsuz Vwnhlij Ndaej Vunz Maij

全州:传统民俗婚礼受追捧

Youq Cenzcouh Yen, gaxgonq bouxcoz gietvaen guhlaeuj aeu giceh bae coux bawxmoq cij gamjdaengz miznaj dangqmaz. Seizneix, diegde bouxcoz gaijbienq gvanhnen lo, coux bawxmoq, haengguh ram giuh, boq loxlez, diuqfoux niujyanghgoh, sawj hoihlaeuj nauhyied youh ndaej mbaet cienz. Cungj angqhoh gietvaen conzdungj fungsug youh miz daegsaek neix, yied daeuj yied ndaej daengz gyoengq bouxcoz dangdieg gyaezmaij.

(Vangz Swcang)



▲ Ranz gwizmoq ram giuh, boq loxlez bae cien bawxmoa.

Yangzsoz: Beixnuengx Yauzcuz Swnghhoz Ndei

阳朔:瑶族同胞生活丰富多彩



▲ Ndaw ranz beixnuengx Yauzcuz venj rim nohlab.

Yangzsoz Yen Fuzli Cin Lungzvej Cunh dwg Yangzsoz Yen dieg Yauzcuz beixnuengx comzyouq ndeu. Gizneix, yienznaeuz swyenz vanzging mbouj ndei, hoeng gyoengq beixnuengx Yauzcuz gaenxhong, simsienh, ndiepgyaez swnghhoz, baez daengz ngoenzciet, beixnuengx Yauzcuz couh roq gyonghwet, eu fwen diuq foux, angq hoh ngoenzciet. Moix bi ndwencieng gaxgonq, gyoengqde couh ngauz laeuj gaj mou, guh nohlab saejlab, angq coux ndwencieng. Seizneix, Yauzcuz vwnzva lai cungj lai yiengh youh miz noengzned daegsaek neix fatrongh wenjlwenq, riuz doh lajmbwn. (Siujyenz)